



明詩正聲卷十四

七言古詩五

廣陵

盧純學

撰


江一夔

校閱

王廷相

登黃鶴樓

自作武昌客日食武昌魚此地雖稱好風景三
月不得梁園書黃鶴磯頭一訪古曠覽始覺形
神舒黃鶴飛去幾千載黃鶴高樓至今在樓中
之客日日新江水東流終不改蛇山一萬九千



尺蒼厓突天如壁立闌干飛度俯空濶忽爾江
山見竒色鶴仙上天呼不來日月還照江中臺
摧眉折腰果何益不如行樂心悠哉赤鯉黃金
盤流霞紫璫色把酒要列缺舉手招馮夷劃然
長嘯江浪湧我醉起舞蛟龍飛誰曾搥碎黃鶴
樓誰曾踢翻鸚鵡洲古來狂士已灰燼豪氣仍
與江漢流我生不愧雄豪倫青鎖金門自致身
繡衣白簡搖海岳天子不怒權奸嗔朝拜龍
墀下暮投荒海濱鯨鯢磨牙伺人肉敢料沙蟲
不殺人千年 聖人陟九五天日開明燭地戶
雷霆一擊朝野清滌盡兇氛遂安堵天下學士
生顏色顧我飄零漸收取洞庭之南蒼梧深常
擬來遊豁遠心一朝入手非難事便欲因之訪
舜琴人言楚人不識鳳德衰之歌何傲岸人言
楚人不識玉卞氏之刑良可嘆手中夜光虹電
隨海底珊瑚未足筭武昌之客黃鶴仙雲夢澤
深蓬島連形容五十未枯槁此生已荷皇天憐
白髮自長酒自醉不須倚劒驚流年

南昌行

豫章妖星蝕太白飛入鉤陳闔光赤欽天博士
不敢奏遠臣見之空嘖嘖周公十鼎八百春漢
代規模遠過秦山東諸侯自破滅淮王雞犬安
能神白洲老子中臺長何用文章諛新莽慶陽
鄙夫稱雄特學得兵書翻助賊南風不競北人
力東門黃犬嗟何及君不見河南許汝登皎皎
真丈夫口中舌可斷萬歲不肯呼匣裡寶刀光
電電悔不先戮梟賊顛報國心丹不言苦甘死
寧能效囚虜已拚魂作太湖雲何惜血染黃州
土黃靈塞天白日昏長風翻江帝心怒鄱陽未
接勤王師坐令狂奴氣先阻汝登汝登振古豪
吞聲苟免蜉蝣曹

胡桃溝行

松州之南茂州北豺狼當道儲餉厄中丞調兵
急於火夜裏平番碉房破游擊將軍張世賢赤
心殺賊不愧天胡桃溝裡被圍急彎弧四顧心
茫然高岬當前後番虜箭鏑奔雷闢地戶胡騶

不幸誤一蹶徒手猶能搏彫虎芮家參將才且
都守邊不數丁大夫忍令對面不相救安在奮
勇西擊胡幾人同來不同死將軍血作溝中水
生時豪氣雄萬人死後忠魂報 天子邊城二
月吹蘆笳怨聲番入胡桃花胡桃花開白練練
溝底行人淚如綫

隴頭吟

君不見羌胡雜種犯邊城燉煌烽火入西京天
子赫怒璽書下嫖姚將軍大典兵燕頤已驚投
筆士龍韜還讓棄繻生犀葉七重分細柳龍泉
三尺勒飛星秦中指點祁連路沙草茫茫不知
處爺娘送上咸陽橋赤憤雙韉走馬去朝發咸
陽橋暮宿隴山坂隴水東入秦行人何時返塞
上烟塵連夕起去去那能計生死春花滿地夢
長安秋月臨關怨隴水泠泠行客怨隴猿
啾啾腸欲斷雕戈鐵馬事橫行那得音書寄鄉
縣塞垣十月陰風號黃沙磧裏陣雲高請纓北
關將軍勇擊劍陰山壯士豪朔吹驕嘶紫騮馬

胡塵汗蟻雲錦袍中軍威策四山飛魚麗蛇蟠
陣角齊六郡良家三十萬相持已合數重圍漢
家據險設萬弩堅戍關城為外戶五陵大俠雙
寶弓犯險提師逐驕虜赤鹽海氣晝昏昏白日
沙場見闢痕月食昴躔胡運滅單于騎火已宵
奔單于散滅邊庭好捷書夜燄燉煌道狼山石
壁既高封鴈塞金甌復新造歸來旌旗壓隴山
隴頭流水照生還論功不願封侯事萬歲君王
閉玉關

燕歌行

漢家防胡重北鄙薊門遼塞連天起雲中帶甲
三十萬河外營田五千里漁陽都護李輕車逐
虜常從瀚海隅金戈鐵馬橫行日伐鼓吹鏡血
戰餘白登山下舊屯軍青海灣西新鬪氛漠漠
春生猶白草蕭蕭日落盡黃雲磧裡陰風卷沙
柳月底秋聲咽刀斗戰馬長嘶邊地寒虎士悲
傷別離久離人日日念還家處婦年年望返槎
塞垣九遇鴛毛雪閨中十見櫻桃花櫻桃花開

燕來早不見征人見芳草無書寄與洛陽春有
夢迷却燕山道胡平燕代羽書稀壯士功成盡
錦衣不恨賤妾憔悴死但願良人及早歸

王尚綱

短歌行

君不見城東少年遊青絲金勒凌五侯又不見
城西少年遊名姬麗曲當朱樓眼前有酒不知
醉過去韶華空自愁

徐禎鄉

猛虎行

上山晨採樵下山逢猛虎深林叢薄不可度熊
貌巉巖兮向我怒虎欲食我低頭據地而長號
使我心悲淚如雨舍中無人言父與妻爨下又
無食使我孤兒啼拔劍前致詞爾胡不仁至此
為凌牙鉅齒食人之肝拒骨而撐屍膏血布川
谷烏銜其肉倒挂東南枝惻惻野草中行哭聲
正悲嬌女行采桑道逢野虎搏食之滄浪之天
更不慈猛虎瞑目若搖思便復舍我直道傷我

欲東歸河無梁綿綿邈邈思我故鄉嗟爾行路
人猛虎當關慎莫行思我父母多苦辛吁嗟猛
虎白額狸斑而黑文何不渡河而去從彼豺狼
群城中咆哮竟夕聞吾將訴汝泰山君猛虎行
且莫歌泰山之君柰若何

送士選侍御

壯士樂長征門前邊馬鳴春風三月柳吹暗大
同城蘆溝橋下東流水故人一樽情未已胡天
飛盡隴頭雲唯見居庸暮山紫羨君鞍馬速流
星予亦孤帆下洞庭塞北荆南心萬里佩刀長
揖向都亭

寄顧華玉

去歲君為薊門客燕山雪暗秦雲白馬上相逢
脫紫貂朝面沽酒城南陌燕山此日雪雰雰祇
見秦雲不見君胡天白鴈南飛盡千里相思那
得聞

青門歌送吳郎

吳郎醉嗜長安酒落魄自言為客久走馬頻看

上苑花回鞭幾折青門柳青門矐矐魚鑰開乳
燕游絲相逐來柳下雕鞍留別袂花間酒盞覆
蒼苔浮雲去去辭城闕芳草連天那可歇野店
春風聽早鶯關河曉樹懸星月千里淮流雙畫
橈廣陵驛前逢暮潮落日帆歸揚子渡青山家
對伯通橋吾家流水元非隔宛轉胥臺通巷陌
草長難尋仲蔚居林深不辨陶潛宅清溪屋下
可垂綸復有蓴羹足獻親君歸倘食冰絲鱠為
念羈栖塞北人

孟洋

沽酒行贈牟韋二撫君

漢陽江上秋風悲落葉淒淒愁別離江南壯士
一相見並馬躊躇數回盼青山烏帽無光輝云
是長安兩錦衣見君北來動鄉思君來想是從
王畿牟公短軀異標格雙頰凝紅鬢垂白韋君
年可四十強方眉廣額身昂藏欲言向余淚盈
臆昔年奉侍君王側日月麒麟殿上行雲霄虎
豹班中直常承密旨按公卿時有微功佐家國

詎料恩榮不可常朝遊禁闕暮江湘遙瞻北斗
空翹首却想西垣祗斷腸北地南州異風土天
暄水濕多憂苦鴻鴈高高向日邊關河迢遞何
時還嗟余亦是投荒者低首聞之雙淚下先朝
末載遊帝京此時牟公已有聲自從逆醜弄權
術鞭撻朝士無虛日扶忠抗義公所優坐廢羅
刑人共恤今皇誅逆法令明韋公牟公乃齊名
纔看執法拖金紫忽復飄零涉江水貧賤榮華
信有時古今人事皆如此君不見張祿先年脫
廁中相秦富貴傾王公又不見魯朱家奴置廣
柳時來復作河東守與君今見且為懽多買江
魚共酤酒

客有為余道京師故事者感而賦傷歌行
君不見長安富家種花竹綺窓蘭榭如金谷四
時留客宴常開齊絃燕管日追陪酒酣賓主皆
傾倒盡道結交苦不早醉倚佳人池水邊金盤
銀碗出時鮮促歌索舞從君欲風度青林明月
懸可憐今夕同歡讌人事分明有更變家破亭

臺日漸非園荒桃李花如霰主人醉舍燕分飛
送葬無人弔者稀諸兒道上有饑色舊客相逢
不相識莫咲衰絲重博徒人生緩急誰所無叩
門不以親為解信是昂藏一丈夫

夜泊石頭口

初月照江清愁人見月那為情寂寂空江徒極
目扁舟獨伴漁翁宿舟人盡睡不知醒防夜知
更喚僮僕然燈起坐心膽摧况乃隄岬聞猿啼
秋潭無雲渚花落寒波欲動風淒淒舟中有賈
爾何苦夜唱棹歌自搖櫓北客聞之淚如雨

鄭善夫

鍾吾行

皚霜凜凜頽楊柳鍾吾驛前白狐走山東虎穴
已盡除淮北人烟亦何有自從天狼犯東斗殺
掠如山如拉朽四溟兵氣寒不揚縱有城隍誰
則守黃河無梁葦可渡曷不去此甘為虜就中
一室三十口那得孤兒應門戶投生避死誰不
知鍾吾令長實主之

長歌行

南湖谷老誰識爾被褐裹頭卧桑梓早時讀易
編屢絕直道如弦仕三已郎官十年窮不休八
口羞稱折腰米虞廷臯夔苦夢寐前代君臣若
魚水老驥伏櫪志千里綈袍百結吾不恥魯生
甘守白茅屋張良還從赤松子洛陽少年抱區
區漢室規模叔孫禮嗟哉往事誰向語惠施無
人子期死鳳凰樓下黨錮成濁流豈但十一士
君不見申屠蟠滅迹烟霞裡又不見郭林宗涉
世終泥滓滄江日落歸去來東山草堂安在哉
遲清亭子風拔顏貧賤如此令心哀殷王中興
圖逸才孰為霖雨為鹽梅終日畚鍤歌徘徊於
乎終日畚鍤歌徘徊

題黃巖沙埠葉氏金雞紫石

沙溪溪上一巨石磊磊魄魄數千尺此石閱世
幾興衰滿身多帶紫霞色我疑當時墮天星四
面好山如画屏西山月落天東曙忽有金鷄飛
上鳴又聞方巖靈壁石聲如青銅色碧玉只今

久臥空牆隈我昔見之重歎息乃知此石有神
靈四時常帶松風聲武宗時夫餘國獻松風石深山霹靂不
敢犯年年秋雨莓苔青老夫欲着東山屐會稽
東望霞城赤相呼主人石上坐一曲瑤琴海天
碧

猛虎行

玄陰冥冥天欲雨蒼兕嗥風劈林莽磨牙下山
天為愁白日殺人如捕鼠我忽聞言仗劍出彎
弓却射白石入吁嗟鳳麟無時來故使此輩為
民灾不然驅爾渡河去河北蒼生非草萊

朔州行

朔州城頭疑黑雲朔州城下邊人魂胡兒悍驕
好殺戮少壯戰死今無存悲風南下吹簾築馬
逸飲血太白窟不見鏡歌入塞門但見人骨白
岑律近來衣冠苦出粟豈說千朝養精卒班生
介子不應募額弄胡笳令歸去時逆瑾罰士夫入邊儲

汶上對月聞笛作商調哀切命舩人度曲
為和因賦醉歌

馬耆八月高風起鴻雁群飛渡洪水月下清砧
愁遠人天涯芳草思公子王郎哀時最蕭瑟萬
里迢迢向南國呼我上船設冰鱠仰天頌酒開
胸臆關山茫茫何處邊但見急管哀中天馮夷
聽曲波面出楊柳亂落西風前酒酣月落歌未
已隴思江情嗒然起未掛姓名玉策上願添海
水金樽裡人生合歡那可測有似大海翻萍葉
回首親朋各別離豈無江漢通舟楫流光過鳥
不復駐達官好爵身之蠹况乃豺狼橫地軸何
限驂騑窘天步竹林諸賢皆酒徒嗣宗只願步
兵厨古來賢達一澌盡醉鄉之托今何如

行淮北戰場

我軍渡淮水倉卒見賊壘一聲金鼓鳴馬躍昏
風起三千義兵坐倒戟一日同赴黃河死嗟爾
漁樵人何曾識蒐狩但聞鶴唳膽已落乃使執
盾從敵後邊頭將軍故縮手要取金印大如斗
淮陰寡妻啼向天遺恨東行劉太守

孫緒

貧交行

晉秦累世空姻好耳餘千古傷懷抱斷金
刎頸盟猶寒何況區區杯酒歡君不見信陵君平原
君填門死士常紛紛邯鄲一警俱烏散鼓刀朱
亥奪三軍

玉階怨

井桐淅瀝垂寒露綺窓夜夜踈螢度無言歌枕
望明河河畔繁星不知數永巷迢遙漏水深羊
車消息空沉沉驀聞長樂歌鍾發滿榻秋風獨

擁衾

戴冠

送彭仁卿

海風萬里吹丹崖洪濤夜蹴天門開大鳥翻飛
九天外天吳紫鳳紛相回送君行兮聊徘徊我
有短歌君莫倩翠龍之駕猶未迴紫宮玉殿生
香埃千官飽飯坐雲臺萬眼正望羲和來我病
南荒歸不得送君空洒心頭血袖中豈無諫獵
書幾迴北望雲霄客君過金陵見 聖人好將

此意批龍鱗何時下詔罷南巡臣死南荒不敢
嗔

丁丑道中聞鷓鴣

鷓鴣新啼啼且亟草根露濕聲如塞昔聞爾名
未相識今聞爾啼長嘆息試問哥哥行不得何
用一身生兩翼羅浮遙遙雲似墨山高水深路
多棘鷓鴣鷓鴣為爾淚沾臆

常倫

驄馬行

我家櫪上青海驄據鞍八尺行步工追風躡影
鳥翻覆誰其匹者江之龍憶昔淮南討兇寇數
萬義兵操甲冑當時驍騎如雲屯營中獨見爾
馳驟我昔與爾同生死奚忍見爾在泥滓吁嗟
舉世誰孫陽陰霾接天房星藏

長安大賈行

長安大賈舊屠酤金多甲第開通衢自稱漢代
酒家胡曾事霍家馮子都芙蓉照耀金屏紆鳳
凰不動垂流蘇就中妖艷多名姝鮮粧袷服世

所無步搖宛轉青氍毹如意不避紅珊瑚曲房
清夢馳九鳥華燈夜雨聞歡娛有時為具開玳
厨門前雜遝飛龍駒趙琴高張蜀絃舒玉盤次
第來駝酥當筵氣岸左右呼綵衣奔走蒼頭奴
酒酣羅列恣啖哺撫兒指僕談江湖自矜百萬
輸兩都五侯七貴同樗蒲逢掖之子何區區

烏棲曲

斑駁搖轡嘶春風腰環玉重錦繡重青樓倡女
露嬌面高調鳴箏冀郎眄鏡臺尚繞脂粉香雲
鬟初試金鳳皇含羞凝媚耐催促欲前不前影
華燭烏柏烏棲楊柳烟曲房夜宴金屏前笑脫
寶簪叩箏柱聊且聽郎歌玉樹

楊慎

垂柳篇

并序

楚雄苴力橋有垂柳一株婉的可愛往
來過之賦此志感

靈和殿前艷陽時忘憂館裡光風吹千門萬戶
旌旗色九陌三條雨露姿蒼涼苑日籠燕甸縹

日言正聲 卷之十四
三
緲宮雲覆京縣芳樹重重歸院迷飄花點點臨
池見臨池歸院總仙曹應制分題競彩毫詔乘
西第將軍馬時奪東方學士袍金明綠暗留烟
霧舊燕新鶯換朝暮只知眉黛為君顰肯信腰
肢有人妬從此沉淪萬里身可憐憔悴四經春
支離散木甘時棄攀折荒亭委路塵搖落秋空
上林遠娑婆生意華年晚腸斷關山明月樓一
聲橫笛清霜坂

大堤曲

大堤二三月垂楊千萬把上枝堪藏鴉下枝堪
繫馬藏鴉繫馬晚樓邊沉水香焚清酒傳紅霞
宛宛歌聲外漢水團團明鏡前夜飲朝歡眠不
足秋去春來芳草綠只知郎橐盡黃金不道妾
顏銷白玉江有方洲岸有沙牙檣絲纜各天涯
釵橫花困驚殘夢不信行人不憶家

新開嶺行

廢丘關前榛莽積新開嶺上烟嵐闢新途古道
太多岐暝色荒烟帶征客岍下寒江流水碧崖

明言上聲 卷之四
畔霜林楓葉赤日暮畏行豺虎陌松燈苴火投
孤驛北渚鳴鸚應遠更南巒哀猿響終夕

觀金潤甫畫壁歌

壽亭侯廟蒼山傍金生畫壁真擅場只今一百
五十載火旗雲馬神揚揚古來好手吾能說開
元之中三昧絕左衛將軍李思訓右丞才子王
摩詰金生動筆師王李古法不墜今罕比何時
放遣來滇水尋竒亦過蒼山址乘興歛然掃素
壁蛟龍抃舞長風起千年戰功猶昨日颯爽英
姿炯不死想見解衣槃礴時寂寞後代覓心知
蛛絲蟲網日凋壞賞者何人護者誰翻嗟古來
才士蕪沒亦何限感慨為爾擊節生遙悲

別劉善充

錦江煙水星橋渡惜別愁攀江上樹青青楊柳
故鄉遙渺渺征人大荒去蘇武匈奴十九年誰
傳書札上林邊北風故馬南枝鳥腸斷當筵蜀
國絃

明詩正聲卷十五

七言古詩六

廣陵

盧純學

編輯

江一夔

校閱

薛蕙

元夕篇

皇都佳麗地春日艷陽年共愛元宵好爭歌明月篇元宵明月滿蓬萊春色先從上苑來千門宛轉銀屏隔萬戶參差金瑣開千門萬戶連雙闕綵女新粧踏明月映牖窺窓態轉多含嬌凝

睇情無歇正逢春日愛芳菲復值春宵縫舞衣
燈光斜照珊瑚枕香氣空薰雲母扉此時天子
盛遨遊離宮別館足風流纔開鳳島張燈架更
起鰲山結綵樓綵樓峒帶鰲山側複道交衢對
南北萬燭翻疑白日光千燈却亂春星色春星
暗靄迷烟霧仙籞分明見天路空裡翩翩翠蓋
飛雲中冉冉鸞輿度翠蓋鸞輿千萬騎伐鼓縱
金動天地御仗層層錦繡圍廣場隊隊魚龍戲
就中別有王侯客三三五五長安陌夜夜經過

許史家朝朝遊戲金張宅金張許史鬪驕奢金
燈玉帶剪春紗鴛鴦比翼玫瑰樹翡翠雙栖菡
萼花龍膏鳳炬列千行蕙火蘭烟百和香月華
照曜琉璃障霧影氤氲玳瑁梁可憐豪侈誰能
似可憐行樂心無已曲罷頻移歌舞筵醉後重
遊燈火市月市星衢遊未偏東城南陌時相見
妖童繡勒五花馬倡女銀車九華扇妖童倡女
繁華子雙去雙來帝城裡粉色偏從月下明衣
香故向風前起調笑行歌懽未闌浮影流光夜

邊殘朝來試過狹邪路墮靨飄花那忍看

隴頭吟

沙漫漫石簇簇馬仆車摧隴山曲隴山日日行
不前夜夜還從隴間宿關中只說羊腸阪那知
隴坂如天遠隴阪逶迤距西域古來此地稀人
迹山川本自隔華戎君王直欲吞夷狄自從漢
虜互相讎塞上風塵無日休幾羣天馬來荒外
百萬征人戍隴頭堪嗟百萬征西卒半作隴山
山下骨誰為禍首虐斯人後有漢武先嬴秦秦
家無策良可嗤漢制匈奴空爾為但令邊帥謹
備寇何用中原多出師

戰城南

戰城南出城北城南戰尚可城北戰不測清晨
跨鞍馬迎戰城南下虜騎四面來提兵入中野
中野何蒼蒼殺氣互低昂前驅五單于却距左
賢王日出負戈起日入未能止人馬同時困自
念身當死身死棄山阿化為泥與沙平生安足
惜國憂將柰何

鄴都引

君不見當塗父子全盛時鄴都佳麗侔京師芙蓉池上開朱邸玄武苑中羅羽旗九錫纒終俄受禪宮中更起文昌殿功臣北闕賜甲第詞客西園侍清宴雄圖擬謂千萬年于今城闕空雲烟梁沛真人不復起歌舞曾無銅雀妓西陵誰辨古墓田東流唯見漳河水

蔣山卿

燕歌行

清霜落木寒蕭森白日既匿光景沉關山迢迢絕信音目極千里傷人心念君他鄉久滯淫長夜展轉憂難任空閨寂寞愁錦衾涕零如雨不可禁泠泠纖指彈鳴琴張絃促柱發哀吟月明洞戶流清陰涼風飄颻吹我衿起看樹上雙栖禽雄鳴雌飛守故林我何煢煢獨至今

李濂

夷門歌

秦兵鼓譟長平瓦趙人肝腦塗原野邯鄲一夕

陷圍中魏軍不敢屯城下當時獨有信陵君門
前劍舄多如雲不有夷門抱關者誰知屠肆鼓
刀人卧内虎符初入手壯士胷中血一斗北救
邯鄲西卻秦五霸之功今復有平生志氣何雄
豪功成刎頸如拔毛秋風弔古夷門道惆悵荒
城空綠蒿

王廷陳

行路難

北風蕭蕭雨雪滂
辭我親友之朔方
中閨少婦走傍惶
勸君斗酒牽衣裳
道路縱橫多虎狼
歲暮天寒草木黃
結髮本期不下堂
君獨何為慕他鄉
東流之水不西歸
宛轉蛾眉能幾時
人生富貴亦有命
辛苦馳奔空爾為
縱令鼎食有別離
賤妾但甘同餽糜

戰城南

戰城南困城北縱橫腐肉烏鳶食一將侯萬夫
死聖人用之非得已國之守在四鄰善戰之臣
服上刑佳兵者不祥器常勝之家道所忌孤人

子寡人妻獨人父母安忍為銷戈矛滅烽燧戢
爾熊羆長不試鷓鴣逝鳳凰來與民休息歌康
哉

李士允

聞鴈篇

秋思人間正紛紛秋聲天外忽驚聞情類斷
悲落月響如離鶴怨愁雲憐渠南北無寧翼天
隅海曲傳消息別去終期得再逢歸來頗似曾
相識別去歸來道路難何如凡羽一枝安金河

陣簇聲聲急玉塞書田字字寒蒼梧白雲秋色
遠洞庭瀟湘木葉晚風緒遙搏度嶺輕烟蘿不
避衝波險幾度心驚歲序更幾人腸斷月華清
二毛聽切潘郎感九辨哀催宋玉成暮砧亂鳴
何太苦羌笛相和倍淒楚顧影爰思澤中集旋
音應到衡陽阻越王臺畔鷓鴣飛蜀帝魂依杜
宇歸度月萬山揮別淚隨風千里促寒衣憶在
長安憐塌翻同聞曾和同聲客搖落深增白髮
悲沉吟忍對清秋迫望鄉今日幸歸來憂國何

年抱始開青女降霜偏飲恨素娥乘月重銜哀
君不見蘇武使胡持漢節李陵對泣衣沾血丹
心長望灞陵雲白羽遙飛上林雪又不見昭君
出塞擁琵琶託心明月對龍沙願附遐征還漢
關空將清淚滴胡笳別有放臣并怨女別有懷
人兼別侶音傳頓使夢驚秋影落能教淚如雨
却憐中路忽分翔悲鳴憔悴不成行寄言霄漢
冥冥者莫向風波覓稻梁

長安行贈張鳳原司諫

予本夷門抱關者十年竄伏梁臺下祇謂長隨
河上漁誰知復走長安馬長安冠蓋若雲屯已
往豪華似電奔時事紛紜萬變出舊游霄漢幾
人存却憶當年滯淮海君在塵埃尚埋采玉韞
深山輝自生龍潛困水神寧改一別雲泥豈足
論山川遼邈間音塵遙聞釋褐逢明主更喜
封章作近臣汲黯從容青瑣闥方朔浮沉金馬
門補袞真看無闕事焚草何曾解避人竭來避
逅燕京邸相憐白髮青冥裏黃金買賦嗟不逢

白壁無媒悲見毀昨夜長風動地來酣歌擊筑
徒心哀排雲何路通閭闔觀日翹首思蓬萊登
高覽古發長嘯野草蕪沒黃金臺一龍一蛇大
人行時卷時舒昧者衆吾老慚非歷塊足君才
寔比朝陽鳳梁生五噫歌出關杜陵三賦空饑
寒河清難俟何自苦明朝且復歸南山

教英

停針曲

脉脉停針線鈎簾看雙燕石楠花又開君行獨
不見君行在何處日暮橫江渡江空悄無人歷
歷沙頭樹海風憾月潮欲來虎豹躑躅猿猱哀
君何為乎獨徘徊君無郎妾無母君不歸來妾
心苦

豐坊

病馬行贈少宰何燕泉

路傷病馬棄不收乃是天上真驊騮君王玄默
罷遠遊爾輩逸氣空橫秋憶昔山西戰爭起嫖
姚手提三尺水夜半傳呼振鐵衣材官十萬同

言山卷之五
殊死此時銀鞍出塞行甲光一道如流星宵突
重圍忽瓦解晨馳厚陣皆土崩歸來步向丹闕
東園人太僕俱動容却疑房宿觸地裂百仞躍
出悲泉龍茂陵蕭蕭土花碧王良既死誰復惜
非關暫蹶損霜蹄端為一鳴終見斥陰雲高高
八表昏灑淚不到長安塵日落荒城鳥栖背天
明野田霜滿身聞說胡窺白登道邊人被殺如
刈草用爾豈無騰驤力冉冉年華坐成老出門
偶見令我哀買骨誰置千金臺試問天閑十二
駟即今未必無駑材

孫宜

得李子啓孝書寄贈

西江路遙消息阻盡日風濤亂江浦天邊過雁
秋氣深海上傳書客心苦翡翠高樓今作梯玉
闌珠箔美人啼白頭尚有臨邛婦莫向成都戀
故妻

舟中

江寒石出落葉飛荒祠破廟古木圍舟人望之

帆忽落云是采石仙人磯崖高路曲上歌側牽
蘿捫棘時宵衣祠中太白冠裳異風摧雨剝丹
青蔽形貌虛無醉裡身文章寂寞生前意一代
高才不可還青山何處塚纍然乘風忽掛江邊
席悵望曾歌采石編

折楊柳

從軍飲馬長城口下馬來折春楊柳欲藉東風
寄遠意愁看北鴈辭邊土憶昔垂鞭初別家家
園綠柳飛白花九秋戰鼓眠中抱萬里歸塗夢
裏賒坐來此柳成三折銀鞍寶劍猶霜雪傳與
垂楊樓上人青絲裊娜何曾絕

多炆

遊百丈山聞余無且過豫章闕展待先此
奉寄

我住浮雲宮君來天子鄣尋山尋水各逍遙看
樹看雲重惆悵谷口行歌日暮還杖藜何處不
青山莫題鳳字朱門外且聽鸞音半嶺間

張時徹

楚山行贈龍陽李司教

楚山青青楚水碧
達士逃名鍊金石
手寒芳杜製芰荷
種來瓊玖成圭璧
朝乘衡岳雲夕汎瀟湘
雨心期晤喬松
托跡類巢許
芝草出雲根
玉液盈匏尊
皓首一長嘯
春風遍鹿門

新城謠

城烏啞啞夜未旦
城上擊鼓角聲亂
南來使客未遣行
北來夫馬急須辦
里長抱芻肩負穀
無錢顧馬將兒鬻
吏胥逃避屋
啄烏苦遭官府相刺促
君不見朱薨連雲列
畫戟盡是將軍內
官宅里中戶口半流離
沙田草沒無人犁
縣官柰爾何
乞休不得淚滂沱

白紵詞

黃金為棟白玉堂
雕軒繡戶明月光
華筵夜張列圓方
美人彈箏出洞房
蛾眉皓齒發清商
纖羅輕綺隨風揚
含情轉睐嬌態長
牽牛織女空相望

其二

啞啞鳥啼夜未半天河耿耿明星粲腊獸魚禽
作長宴枌漿膾豆雕胡飯塤箎協奏笙鏞間瑤
觥引滿那得筭白紵歌長亂復亂但願長夜不
願旦

其三

羅繡繡結雙鴛鴦金釵十二棲鳳皇蟋蟀宵鳴
入中堂文窓四闢總帷張緝商綴羽歌聲揚山
高水深地天長百年生命不可常我今為樂殊
未央

